


*Die
Gelykenisse
van
Jesus*




Die Gelykenisse van Jesus


Die Twee Bouers1




Die Saaier3



Die Barmhartige Samaritaan6



Die Waaksame Dienskneg11



Die Afdedwaalde Skaap13

Die Verlore Penning15



Die Verlore Seun16

Die Fariseër en die Tollenaar22



Sommige van die prente is deur die Bybelgenootskap se Kees de Kort.


Die Twee Bouers Lukas 6 : 46 – 49

46. En wat noem julle My :

Here, Here! en doen nie wat Ek sê nie?

47. Elkeen wat na My toe kom en na my woorde luister
en dit doen – Ek sal julle wys soos wie hy is.

48. Hy is soos 'n man wat 'n huis bou,
en die fondament op die rots gelê het;



en toe die vloedwater kom

en die stroom teen daardie huis losbreek,

kon hy dit nie beweeg nie,

omdat sy fondament op die rots was.


49. Maar wie dit hoor en dit nie doen nie,
is soos 'n man wat 'n huis
sonder fondament op die grond bou,



en die stroom het daarteen losgebreek
en dit het dadelik geval,
en die instorting van daardie huis was groot.


Die Saaier Lukas 8 : 5 – 8, 11 – 15

5. 'n Saaier het uitgegaan
om sy saad te saai,




en toe hy saai,


val 'n deel langs die pad
en is vertrap, en die voëls
van die hemel het dit opgeëet.




6. En 'n ander deel het op die rots geval,
en nadat dit opgeskiet het,
het dit verdroog,
omdat dit geen
vogtigheid gehad het nie.



7. En 'n ander deel het
tussen die dorings in geval,
en die dorings het daarmee
saamgegroeï en dit verstik.




8. En 'n ander deel het in die goeie grond geval
en gegroei en honderdvoudige vrug opgelewer.




11. Dit is dan die gelykenis:

Die saad is die
woord van God.




12. Dié langs die pad is die hoorders.

Daarna kom die duiwel
en neem die woord
uit hul hart weg,
sodat hulle nie sou glo
en gered word nie.




13. En dié op die rots is hulle wat die woord met blydskap ontvang wanneer hulle dit hoor, en hulle het geen wortel nie, aangesien hulle net vir 'n tyd glo, en in die tyd van versoeking val hulle af.



14. En dié wat in die dorings geval het – dit is die wat gehoor het, en hulle gaan weg en word verstik deur die sorg en rykdom en genietinge van die lewe en dra geen ryp vrug nie.




15. En wat in die goeie grond val – dit is die wat, nadat hulle gehoor het, die woord in 'n edele en goeie hart hou en met volharding vrug dra.



Die Barmhartige Samaritaan Lukas 10 : 25 – 37

25. En daar het 'n sekere wetgeleerde opgestaan
 wat Hom versoek het deur te sê:
 Meester, wat moet ek doen
 om die ewige lewe te beërwe?
26. En Hy antwoord hom:
 Wat is in die wet geskrywe? Hoe lees jy?



27. En hy antwoord en sê:
 Jy moet die Here jou God liefhê
 uit jou hele hart en uit jou hele siel
 en uit jou hele krag en uit jou hele verstand,
 en jou naaste soos jouself.

28. Toe sê Hy vir hom:


Jy het reg geantwoord, doen dit, en jy sal lewe.

29. Maar hy wou homself regverdig, en sê vir Jesus:

En wie is my naaste?

30. En Jesus antwoord en sê:

'n Sekere man het afgegaan van Jerusalem na Jerigo




en onder rowers verval,



en nadat hulle hom uitgetrek en geslaan het,
gaan hulle weg en laat hom half dood lê.

31. En bygeval het 'n priester met daardie pad afgekom,
en toe hy hom sien, gaan hy anderkant verby.



32. En net so het 'n Leviet by die plek gekom
en hom gesien en anderkant verbygegaan.

33. Maar 'n sekere Samaritaan

wat op reis was,
het op hom afgekom,
en toe hy hom sien,
het hy innig jammer
gevoel,



34. en na hom gegaan,

sy wonde verbind en olie en wyn daarop gegooi.




Hy het hom toe op sy eie pakkier gehelp



en hom na 'n
herberg geneem
en vir hom gesorg.



35. En toe hy die volgende môre weggaan,
haal hy twee pennings uit en gee dit aan die eienaar
van die herberg en sê vir hom:



Sorg vir hom,

en enige onkoste wat jy nog meer mag hê,
sal ek jou betaal as ek terugkom.

36. Wie dan van hierdie drie, dink jy, was die naaste
van hom wat onder die rowers verval het?

37. En hy antwoord:

Hy wat barmhartigheid
aan hom bewys het.

Toe sê Jesus vir hom:

Gaan en doen jy net so.




Die Waaksame Dienskneg Lukas 12 : 35 – 40

35. Laat julle heupe omgord wees
en julle lampe aan die brand.




36. En julle moet wees soos mense
wat op hulle heer wag
wanneer hy van die bruilof terugkom,
sodat hulle dadelik vir hom kan oopmaak
as hy kom en aanklop.



37. Gelukkig is daardie diensknegte
vir wie die heer wakker sal vind as hy kom.
Voorwaar Ek sê vir julle, hy sal hom omgord


en hulle aan tafel laat gaan en hulle kom bedien.

38. En as hy in die tweede of in die derde nagwaak kom,
en dit so vind – gelukkig is daardie diensknegte.
39. Maar weet dit: as die huisheer geweet het
in watter uur die dief sou kom, sou hy gewaak het
en nie in sy huis laat inbreek het nie.
40. Julle moet dan ook gereed wees,
omdat die Seun van die mens kom
op 'n uur dat julle dit nie verwag nie.




Die Afgedwaalde Skaap Lukas 15 : 1 – 7

1. En al die tollenaars en sondaars het die gewoonte gehad om na Hom te kom en na Hom te luister.
2. En die Fariseërs en die skrifgeleerdes het baie gemurmureer en gesê:
Hierdie man ontvang sondaars en eet saam met hulle.
3. Toe vertel Hy aan hulle hierdie gelykenis en sê:
4. Watter man onder julle wat honderd skape het en een van hulle verloor,
laat nie die negen-en-negentig in die woestyn staan en gaan agter die een aan wat verlore is totdat hy dit kry nie?



5. En as hy dit kry,
sit hy dit met blydschap op sy skouers.
6. En as hy by die huis kom,
roep hy sy vriende en bure bymekaar en sê vir hulle:
Wees saam met my bly,
want ek het my skaap gekry wat verlore was.
7. Ek sê vir julle dat daar net so blydschap sal wees
in die hemel oor een sondaar wat hom bekeer,
meer as oor negen-en-negentig regverdiges
wat die bekering nie nodig het nie.




Die Verlore Penning Lukas 15 : 8 – 10

8. Of watter vrou wat tien pennings het,



as sy een penning verloor,
steek nie 'n lamp op en vee die huis uit
en soek sorgvuldig totdat sy dit kry nie?

9. En as sy dit kry, roep sy haar
vriendinne en buurvroue
bymekaar en sê:



Wees saam met my bly,
want ek het die penning gekry wat ek verloor het.

10. So, sê Ek vir julle, is daar blydskap voor die engele
van God oor een sondaar wat hom bekeer.

Die Verlore Seun Lukas 15 : 11 – 32

11. Hy het ook gesê: 'n Man het twee seuns gehad.
12. En die jongste van hulle het vir sy vader gesê:



Vader,
gee my die deel
van die eiendom
wat my toekom.

En hy het die goed tussen hulle verdeel.

13. En nie baie dae daarna
nie het die jongste seun
alles bymekaargemaak
en weggereis na 'n ver
land.



En daar het hy sy
eiendom verkwis deur losbandig te lewe.

14. En toe hy alles deurgebring het,
kom daar 'n swaar
hongersnood in
daardie land,
en hy het begin
gebrek ly.



15. Toe het hy hom by een van die burgers
van daardie land gaan voeg.

En dié het hom in sy veld gestuur om varke op te pas.



16. En hy het verlang om sy maag te vul met die peule
wat die varke eet,
en niemand het dit aan hom gegee nie.

17. Maar hy het tot homself gekom en gesê:

Hoe baie huurlinge van my vader het oorvloed
van brood, en ek vergaan van honger!


18. Ek sal opstaan en na my vader toe gaan,
en ek sal vir hom sê:

Vader, ek het gesondig teen die hemel en voor u,

19. en ek is nie meer werd om u seun genoem
te word nie; maak my soos een van u huurlinge.

20. En hy het opgestaan en na sy vader gegaan.

En toe hy nog ver was, het sy vader hom gesien



en innig jammer vir hom gevoel

en gehardloop en hom omhels en hartlik gesoen.


21. En die seun sê vir hom:
 Vader, ek het gesondig
 teen die hemel en voor u,
 en ek is nie meer werd
 om u seun genoem
 te word nie.



22. Maar die vader sê vir sy diensknegte:
 Bring die beste kled en trek vir hom dit aan,
 en gee 'n ring vir sy hand en skoene vir sy voete.

23. En bring die vetgemaakte kalf en slag dit,
 en laat ons eet en vrolik wees.

24. Want hierdie seun van my was dood
 en het weer
 lewendig geword,
 en hy was verlore
 en is gevind.



En hulle het begin vrolik word.

25. En sy oudste seun was in die veld,
en terwyl hy al nader na die huis kom,
hoor hy musiek en beurtsange.
26. En hy roep een van die diensknegte na hom toe
en vra wat dit beteken.
27. Dié sê toe vir hom: U broer het gekom,
en u vader het die vetgemaakte kalf geslag,
omdat hy hom gesond teruggekry het.
28. En hy het kwaad geword en wou nie binnegaan nie.
Sy vader gaan toe uit
en smee hom.



29. Maar hy antwoord
en sê vir sy vader: Kyk, ek dien u so baie jare
en ek het nooit u gebod oortree nie,
en vir my het u nooit 'n bokkie gegee,
sodat ek saam met my vriende vrolik kon wees nie.

30. Maar toe hierdie seun van u kom,
wat u goed met hoere deurgebring het,
het u vir hom die vetgemaakte kalf geslag.

31. Toe sê hy vir hom:


Kind, jy is altyd by my, en al wat myne is, is joue.

32. Ons moet tog vrolik en bly wees,
want hierdie broer van jou was dood
en het weer lewendig geword,
en hy was verlore en is gevind.




Die Fariseër en die Tollenaar Lukas 18 : 9 – 14

9. En Hy het ook met die oog op sommige wat op hulleself vertrou dat hulle regverdig is en die ander verag, hierdie gelykenis vertel.
10. Twee manne het na die tempel opgegaan om te bid, die een 'n Fariseër en die ander 'n tollenaar.
11. En die Fariseër het gaan staan en by homself so gebid:
O God, ek dank U dat ek nie soos die ander mense is nie – rowers, onregverdiges, egbrekers, of ook soos hierdie tollenaar nie.
12. Ek vas twee keer in die week, ek gee tiendes van alles wat ek verkry.



13. En die tollenaar het ver weg gestaan
 en wou selfs nie sy oë na die hemel ophef nie,
 maar het op sy bors geslaan en gesê:
 O God, wees my, sondaar, genadig!



14. Ek sê vir julle, hierdie laaste een het geregverdig
 na sy huis gegaan eerder as die eerste een,
 want elkeen wat homself verhoog,
 sal verneder word,
 en hy wat homself verneder, sal verhoog word.